

son père. Car en toutes les guerres, batailles et affaires des roys de France, il fut si loyal et diligent executeur qu'il ne sen trouva son pareil de son temps; et fut rempli de toutes bonnes vertus. Il fut tres honneste et devotieux, mesmement envers la glorieuse vierge Marye, mere de Jesus-Christ; à laquelle il avait singuliere devotion. Ledit Eddouard mena grand nombre de gentilzhommes et aultres gens de guerre au saint voyage doultremer a ses propres coustz et despens, et combattit par lui longtemps contre les infidelles et ceulx qui suyvoient la loi de Mahomet, et apres sen revint en son pays de Beaujolloys. A son retour, le roy (Philippe de Valloys) le fet mareschal de France. Il print a femme et espouse madame Marye du Thil, fille de messire du Thil, laquelle fut tres prudente et saige femme en son temps, aornée de toutes bonnes meurs. Elle fut maryee (1) lan de grace mil trois cens seize, le sixieme jour de novembre, et eust mondit seigneur Eddouard en mariage, pour ladite dame, le chateau de Corboille et le chateau de la Roche de Montley, la Chastelenye de Montagny avec la prevoste de Carrisy en Lyonnois.

Il eut et engendra de sadite femme un beau filz, lequel fut nomme Anthoine, lequel nasquit au chasteau de Poilly, lan mil trois cens dix huict, le douzieme jour daoust, et une fille nommee Marguerite, laquelle nasquit au chasteau de Montmerle lan mil trois cent quarante six, le vingtiesme jour du mois doctobre.

Le tres noble seigneur Eddouard eust en son temps les Juifs en moult grand hoyne, et nayma auculnement leur conversation parce quilz avoyent laschement cruciffie le sauveur de tout le monde. Par quoi, en signe de se venger de la grand injure faicte a notre sauveur Jesus-Christ, il chassa et deboutta de son pays tous les Juifs et Juifves quil y trouva, et ny en de-

(1) Le copiste a ajouté ici par inadvertence le mot *naquit*.